



Selon le desir du seruiteur d'Abraham, Rebecca vint au Puy, qui luy donne à boire ; laquelle il prend pour femme à Isaac.

R Abraham ja vieil fit iurer son plus ancien seruiteur, de ne point prendre femme pour son fils de la race des Chananéens ; mais qu'il allast en Mesopotamie, l'asseurant que l'Ange du Seigneur conduiroit son voyage. Adonc ce seruiteur chargea dix chameaux de tout ce qu'il auoit besoin, & s'en alla en Mesopotamie, en la Cité de Nachor, & fit reposer ses chameaux hors la Cité près le Puy. Et lors il pria Dieu, disant : O Seigneur, Dieu de mon seigneur Abraham, donne-moy bonne rencontre aujourd'huy, & me fais cette grace que ie puisse bien effectuer la charge qui m'est donnée. Ie me tiendray auprès de la fontaine pendant que les filles des gens de la Cité sortent pour puiser de l'eau ; & la jouuencelle à qui ie diray, abbaïsse ta cruche afin que ie boiue ; & qui dira, boy, & aussi ie donneray à boire à tes chameaux ; soit celle que tu as préparée à ton seruiteur Isaac. Et aduint quand il eut acheuë cette priere ; la pucelle Rebecca vint, & effectua tout le desir du seruiteur, luy donnant à boire, & abbreuua ses chameaux, puis le mena chez son pere Bathuel ; lequel entendant le fait, la donna pour femme d'Isaac, avec grand contentement du seruiteur, qui luy bailla les pendans d'oreilles, & brasselets d'or, qu'il auoit apportez pour luy presenter.